

MISA CON NENOS

3 de marzo de 2019

T. Ordinario -8º C

S. LUCAS 6, 39-45: "Do que reborda do corazón fala a boca".

MENSAXE: Para dar bo froito
hai que atesourar bondade no corazón



**Para dar bo FROITO hai que
atesourar bondade no CORAZÓN.**

1. ACOLLIDA

Irmáns e irmás: Desde que rematamos as festas de Nadal xa celebramos 8 domingos do tempo Ordinario. A partir da próxima semana comezaremos a Coresma, a preparación da Pascua. Pero todos os domingos celebramos que nos atopamos con Xesús e nos sentimos felices por iso. Hoxe, no evanxeo, Xesús dános uns consellos sabios para ensinarnos a vivir e comportarnos como persoas de ben e como discípulos seus: “ver a viga no noso ollo” e “ser árbore que dá bo froito”.

(Podemos saír co cartel de Fano deste domingo).

2. PERDÓN

(Sacerdote): Moitas veces no noso modo de vivir cústanos querer e perdoar a todos. Por iso, ao iniciar a Eucaristía recoñecémolo e pedimos perdón.

- *(Posible catequista):* Porque ás veces os discípulos de Xesús desprezamos os que non pensan coma nós. **Señor, ten piedade de nós.**

- *(Posible pai-nai catequista):* Porque ás veces os discípulos de Xesús non estamos dispostos a aprender, a dialogar e cambiar. **Cristo, ten piedade de nós.**

-- *(Posible neno-nena):* Porque ás veces os discípulos de Xesús podemos enganar facendo o contrario do que anunciamos. **Señor, ten piedade de nós.**

(Sacerdote): Que o Deus do amor teña misericordia de nós, perdoe os nosos pecados e nos leve á vida eterna. Amén.

3. PALABRA DE DEUS

MONICIÓN ÁS LECTURAS

Escoitemos con atención a palabra de Deus. O libro do Eclesiástico invítanos á prudencia no falar. Xesús ensínanos o camiño da sensatez.

Pero a fe cristiá é máis que un estilo de vida, por iso Paulo vai á excelencia: confesamos a vitoria de Cristo sobre a morte que é tamén a nosa vitoria.

ECLESIÁSTICO: 27, 4-7

No eloxies a ninguén antes de oílo falar.

Cando se axita a criba, queda o farelo; así, cando a persoa fala, descóbrense os seus defectos.

O forno proba as vasillas do oleiro, e a persoa é probada na súa conversación.

O froito revela o cultivo da árbore, así a palabra revela o corazón da persoa.

Non eloxies a ninguén antes de oílo falar, porque aí é onde se proba unha persoa.

Palabra do Señor.

SALMO 91: R/. É bo darche grazas, Señor.

1 CORINTIOS 15, 54-58: Dános a vitoria por medio de Xesucristo.

LUCAS 6, 39-45: Do que reborda do corazón fala a boca.

Narrador: Naquel tempo, díxolles Xesús aos discípulos unha parábola:

Xesús: -«*Seica pode un cego guiar a outro cego? Non caerán os dous no foxo? Non está o discípulo sobre o seu mestre, aínda que, cando remate a súa aprendizaxe, será como o seu mestre.*

Por que te fixas no lixo que ten o teu irmán no ollo e non reparas na viga que levas no teu? Como podes dicirle ao teu irmán: “Irmán, déixame que che saque o lixo do ollo”, sen fixarte na viga que levas no teu? Hipócrita!

Saca primeiro a viga do teu ollo, e entón verás claro para sacar o lixo do ollo de teu irmán.

Pois non hai árbore boa que dea froito malo, nin árbore mala que dea froito bo; por iso, cada árbore coñécese polo seu froito; porque non se recollen figos das silveiras, nin se vendiman acios dos espiños.

O home bo, da bondade que atesoura no seu corazón saca o ben, e o que é malo, da maldade saca o mal; porque do que reborda do corazón fala a boca».

Palabra del Señor.

(Narrador - Xesús)

4. ORACIÓN DA COMUNIDADE

(Sacerdote): Oremos ao Pai do ceo e pidámoslle confiados:

-Pai bo, escóitanos.

- 1.- Pola Igrexa, para que nos ensina a grandeza de crer e de amar a Deus. *Oremos.*
- 2.- Polos que nos reunimos cada domingo para que descubramos a luz de Xesús. *Oremos.*
- 3.- Para coidemos o corazón onde nacen os sentimentos profundos. *Oremos.*
- 4.- Para que botemos da nosa vida as críticas desapiadadas e os xuízos desapiadados. *Oremos.*
- 5.- Para que evitemos as mentiras, as contradicións ao falar sen facer o que dicimos. *Oremos.*
- 6.- Para que o Señor nos de á vez valentía, claridade, humildade e prudencia. *Oremos.*
- 7.- Polos que nos educan e por tantas persoas que son para nós exemplo para actuar ben. *Oremos.*

(Sacerdote): Escoita, Pai, a nosa oración e transforma os nosos corazóns coa túa graza salvadora. Por XNS.

5. PRESENTACIÓN DE OFRENDAS

(Posibilidades)

- ESPÍRITO SANTO EN FORMA DE POMBA:

Que difícil é vivir o evanxeo destes domingos: amor aos inimigos, coidar o corazón, dar bos froitos... Por iso necesitamos do teu Espírito que nos renove e transforme as nosas mentes e corazóns.

UN CORAZÓN VERMELLO:

No corazón é onde nacen as actitudes, os bos sentimentos, os desexos de cada un. Dános, Señor, un corazón alegre e bondadoso como o teu, e os pais, catequistas e profesores prometemos seguir educando os nenos na materia da bondade e do amor.

PAN E O VIÑO:

Finalmente, queremos que o pan e o viño convertidos no Corpo e o Sangue de Xesús sexan nosa forza para parecernos máis a Xesús e colaborar na construción do Reino.

6. SUXESTIÓNS:

- Facede vosa a mensaxe do evanxeo de hoxe: “O home bo da bondade que atesoura no seu corazón saca o ben”.
- Coida o corazón, pide a axuda do Espírito, cambia o que ten de mal.
- Dá grazas aos pais, catequistas e a todos os que te guían para que mellores na vida. Deixa que Xesús sexa a túa luz, o teu compañeiro de camiño.
- Debuxade un corazón grande como o de Fano e dentro poñedes os nomes das persoas que vos axudan a crecer na vida.
- -Se nos fixamos na primeira lectura: “Non eloxies a ninguén antes de oílo falar, porque aí é onde se proba unha persoa” ou na idea do evanxeo da lección que nos dá Xesús de ser coherentes, de que hai que cumprir o que dicimos, poderíase facer a seguinte dinámica:

Elíxese un grupo de 10 ou 12 nenos e póñense de pé en círculo e no centro un neno sentado e só. O neno do centro elixe a 4 para que o axuden a erguerse pero eles póñense a pensar pero non axudan. Despois elixe a outros 3 e empezan a falar de como axudalo, pero non fan nada. Logo, dous deles, sen previo aviso, van ao centro e axúdano a erguerse. A idea é que ademais de pensar hai que actuar en consecuencia. Pero Deus sempre manda persoas, as que menos imaxinamos, para axudarnos.

POSIBLE ACCIÓN DE GRAZAS

Señor dános un corazón limpo e bo

Señor, ensínanos a mirar cos teus ollos, ollos serenos, limpos, cheos de bondade.

Os nosos engánannos, as nosas escuridades empapan o que vemos contaxiando aos demais o noso pesimismo e a nosa negatividade.

Líbranos das vigas dos nosos ollos para que a nosa mirada sexa limpa, para que poidamos ver claro e así poder axudar os nosos irmáns a desfacerse do lixo do seu ollo.

Entón poderemos mirarnos fixamente. Sen a viga que nos deforma volvemos ser como ti queres e vemos o mundo cos teus ollos.

Que a nosa mirada sexa suficientemente transparente para ser capaces de cambiar o mundo.

Que o noso corazón sexa suficientemente limpo para que os nosos ollos te poidan ver en todas partes, en todo o que nos rodea, e sobre todo na mirada dos nosos irmáns e irmás.

FELIZ DOMINGO, DIA DEL SEÑOR

RED CATEQUISTAS GALICIA